


---

ՀԱՄԼԵՏ ՀԱՐՈՒԹՅՈՒՆՅԱՆ. Նոր Բայազետի գավառը 1920–1930 թթ., Երևան, ՀՀ ԳԱԱ «Գիտություն» հրատ., 2015, 278 էջ:

*Վերջերս ընթերցողի սեղանին դրվեց բազմահմուտ պատմաբան, պ. գ. դ., պրոֆ. Համլետ Հարությունյանի «Նոր Բայազետի*



*գավառը 1920–1930 թթ.» մենագրական աշխատության երրորդ գիրքը, որով հեղինակն ամբողջացրեց իր բազմամյա գիտական պրպտումների արգասիքը հանդիսացող Երևանի նահանգի ամենաընդարձակ գավառի՝ Նոր Բայազետի ավելի քան 100-ամյա պատմությունը: Հիշեցնենք, որ գավառի բազմաշերտ ու համալիր պատմությունը նվիրված հեղինակի 1-ին գիրքն ամփոփում էր Արևելյան Հայաստանի, այդ թվում՝ գավառի Ռուսաստանին միացման պահից*

*(1828 թ.) մինչև Առաջին աշխարհամարտի նախօրեն (1913 թ.), 2-րդը՝ պատմաքաղաքական դեպքերով և իրադարձություններով շատ ավելի հազեցած 1914–1920 թթ. ժամանակաշրջանը: Գրախոսվող 3-րդ գրքում Նոր Բայազետի պատմության շարադրանքը հասցված է մինչև 1930 թ. կեսերը, երբ կուսակցական-պետական բարձրագույն մարմինների որոշմամբ, տեղերի հետ կապը ավելի ամրապնդելու և կառավարումն ավելի արդյունավետ դարձնելու նպատակով, գավառները վերացվեցին ու դրանց տրոհման միջոցով ստեղծվեցին շրջաններ, որոնք պահպանվեցին մինչև 1990-ական թվականների կեսերը:*

*Դժվար չէ նկատել, որ ժամանակագրական առումով երեք մասից բաղկացած սույն ուսումնասիրությունը օրգանական մի ամբողջություն է, որը լիակատար պատկերացում է տալիս Հայաստանի սոցիալ-տնտեսական, հողակլիմայական ծանր, սակայն յուրահատուկ լեռնային ու լճային պայմաններ ունեցող երկրամասի մասին:*

Առաջին հայացքից թվում է, թե հետազոտության թեման ընդգրկում է Հայաստանի ընդամենը մեկ գավառ: Սակայն ծանոթանալով աշխատության բուն շարադրանքին՝ կարելի է տեսնել, որ գավառի վարչաժողովրդագրական պատկերը, սոցիալ-տնտեսական, հասարակական-քաղաքական ու հոգևոր մշակութային կյանքը ներկայացված են հայոց պատմության լայն խորապատկերի վրա: Այլ խոսքով՝ Նոր Բայազետի գավառը ներկայանում է որպես Հայաստանի պատմության մի մանրապատկեր:

Հ. Հարությունյանն իր առջև դրված խնդիրները վեր հանելիս հետազոտությունը տարել է ոչ թե էքստենսիվ, տարածական ու ծավալային, այլ ինտենսիվ՝ խորքային բացահայտումների ուղիով: Այստեղ մի կողմից հեղինակին օգնել են հսկայական, մեծամասամբ նորահայտ արխիվային հարուստ փաստաթղթեր և այլ վավերագիր նյութեր, էլ չենք խոսում հիմնահարցին վերաբերող տպագիր սկզբնաղբյուրների, վիճակագրական ժողովածուների, ժամանակի մամուլի և այլնի մասին, մյուս կողմից՝ հետազոտական, փաստական ու վիճակագրական տվյալները վերլուծելու, համադրելու ու ընդհանրացնելու նրա մեծ ունակությունները:

Ինչպես ասվեց, գրախոսվող գրքում Հ. Հարությունյանը հետազոտել է Խորհրդային Հայաստանի օրգանական մասը կազմող Նոր Բայազետի գավառի առաջին տասը տարիների պատմությունը՝ իր դրսևորումներով ու յուրահատկություններով: Չնայած խորհրդային վարչակարգին բնորոշ վարչահրամայական, միակուսակցական կառավարման համակարգին, այնուամենայնիվ, հեղինակը փաստական հարուստ նյութերի ու տվյալների հիման վրա արձանագրում է, որ Նոր Բայազետի գավառը, 1920-ական թվականներին, նախընթաց տասնամյակների համեմատ, ակնառու տեղաշարժեր ու աճ է ապրել կյանքի գրեթե բոլոր ոլորտներում՝ բնակչության ընդհանուր աճի, անգրագիտության վերացման, կրթամշակութային կյանքի զարգացման ուղղությամբ:

Գավառի տիպական օրինակով՝ Հ. Հարությունյանն անդրադառնում է ՆԷՊ-ի պայմաններում տնտեսության վերականգնման, ընտրական, հողաշինարարության, հողաբաշխման, հարկային համակարգին և այլն: Հասարակական-քաղաքական կյանքի լուսաբանման առումով ճանաչված պատմաբանի տեսադատից դուրս չի մնացել Փետրվարյան 1921 թ. ապստամբությունը,

որը, ինչպես հայտնի է, որոշակի արձագանք էր ստացել նաև գավառում: Մեկ ամբողջական գլուխ է նվիրված պատմագիտական գնահատականի առումով ոչ միանշանակ այդ իրադարձություններին: Գավառում ընթացող դեպքերը ներկայացված են հանրապետությունում ծավալվող իրադարձությունների ընդհանուր ֆոնի վրա: Ի պատիվ հեղինակի՝ տրված գնահատականները, մեր կարծիքով, փաստարկված են, հիմնավոր ու անառարկելի:

Քննարկվող աշխատության գիտական արժեքը մեծանում է նրանով, որ հեղինակը բավարարվել է ոչ թե ազգաբնակչության տեղաշարժերի, գյուղատնտեսության ու անասնազրկի աճի, դպրոցական-կրթական ու մշակութային շինարարության և այլ ոլորտներում սոսկ փաստեր արձանագրելով, այլ աղբյուրագիտական-վիճակագրական ցաքուցրիվ տվյալների համակարգման միջոցով, տքնաջան հաշվարկների հիման վրա կազմել է ընդհանուր թվով 14 աղյուսակ և կատարել դրանցից բխող վերլուծություններ ու ընդհանրացնող եզրահանգումներ: Գրքի վերջում բերված է նաև 4 ցուցակներից բաղկացած հավելված:

Այսպիսով, մեր կարծիքով, ընթերցողի դատին հանձնված Հ. Հարությունյանի սույն մենագրությունը Նոր Բայազետի կյանքը համակողմանի լուսաբանող հիմնարար, գիտական տեսակետից բարձրարժեք, մեթոդական առումով պատմագիտության արդի չափանիշներով շարադրված, կառուցվածքով կուռ և ամբողջական ուսումնասիրություն է, որն արժանի է ամենայն դրվատանքի: Սույն ձեռնարկը կարող է նաև լավ նախադեպ դառնալ Հայաստանի մյուս գավառների ու երկրամասերի նմանատիպ հետազոտման առումով, որը, անշուշտ, բացի պատմագիտականից, ունի նաև հայրենագիտական-ճանաչողական նշանակություն:

ԱՐԱՐԱՏ ՀԱԿՈՒՅԱՆ